

Valeux

木棉花



Miz vunz maij gij vadugenh saek ronghlwenq haenx; miz vunz maij gij vameizgvei maez vunz haenx; miz vunz maij gij va'ngaeux ndwn ndaw raemx gyauegetget haenx, hoeng gou dauq maij gij valeux nding lumj feiz haenx.

Hagdangz dou miz haujlai go faexleux. Moix bi mbwn raeuj va hai seiz, gou cungj maij bae laj go faexleux gvaengzgvax, bineix hix dwg yienghneix. Gou ndwn youq haj laeuz yawj doxroengz, yawj ndaw hagdangz valeux hai gij gingj gyaundeidei haenx. Youq ndaw guengh mbaw loeg mbaw heu, gij valeux baenz duj baenz duj haenx couh lumj baenz bog baenz bog feiz dawzyubyub. Mbaw loeg va hoengz, gij gingj gyaundeidei neix lamh lwgda gou, ngaueu hoenz gou. Lingz hwnjdangz yiengj lo, gou lij mbouj sij ndaej lizhai.

Gou deng gij valeux gyaundeidei neix maez lo, roengzdangz le, sikhaek buet daengz henx cauhcangz laj golex, siengj dep gyawj yawj gij valeux gou gyaenz haenx. Go faexleux hung sang sohnwd, couh lumj dwg bouxbing hen hagdangz. Gwnz nyefaex sangvidvid haenx hai baenz duj baenz duj va, hix lumj gij daengloengz hoengz ngoenzciet venj haenx, nding dwk lwenqda, hoengz dwk maez vunz. Gou cingq maezngunh youq ndaw gingj gyaundeidei neix, duj valeux he doek roengzdaeuj, de loenq le hix gig saenzheiq, youq gyang mbwn lij damhdingh yienghgaeuq, baenqlili cigsoh cung roengzdaeuj, yienzhaeuh "ba" sing ndeu ninz roengz gwnz namh dangqnaq gou bae. Gou gip hwnjdaeuj baez yawj, valeux miz haj limq, limqva nanwtntw, humxhomh bog simva saekhenj he, aen dakva caebcomz gij limzva maenhsdswd, duj de hung baenz lumj aenvanj. Va loenq hix mbouj doiqsaek, hix mbouj reuq, it di cungj mbouj lumj gij va loenq gou baez naengz raen haenx reuqledled, de couhcinj vutmingh le lij dwg yienghneix maenh' ak. Seizneix gou gamjdaengz gij sengmingh valeux baenz geng baenz ak, de lumjbaenz dawz swheij daengxcungq gyaundeidei cungj soengq hawj dou, gvaicq mbouj ndaej gyoengqvunz haenx de dwg vayinghyungz.

Valeux mboujdan yienghsiengq gyaundeidei, lij baenz guh yw. De ndaej cawz ndat, leih nyoh, gaij doeg, mboujguenj dwg va heu roxnaeuz dwg va dak sauj, cungj baenz dawzdaeuj cawj raemxdang. Gvangjdungh miz haj cungj va okmingz, valeux couh dwg cungj ndeu.

Valeux caen gyaundeidei. Caen miz yungh ha! Gou gyaenz gij valeux daegbied neix.

(Meiz Vanvunh)

Seizcin Daeuj Lo



Youq ndaw sing angq sing riu, dou soengq aen seizdoeng hausausau byaij lo, youh coux ma aen seizcin lai saek lai yiengh.

"Seizcin daeuj lo, seizcin daeuj lo!" Roeggacak ndwn youq gwnz nyefaex hemq dwk. Sing hemq de hemq ndiu gofaexliux, gode did gij nyod heuyauyau okdaeuj; sing hemq heuh ndiu gova go'nywj, gyoengqde haenqrengz daj ndaw namh con okdaeuj; sing hemq heuh ndiu raemxrij, gyoengqde dwk yungz gij naehang seizdoeng; sing hemq heuh ndiu gyoengq doenghduz iq, gyoengqde foenfoen byaij ok dou ranz, fwngz rag fwngz guhcaemz, youh diuq youh ciengq: "Gyoengq doenghduz iq geijlai vaiqvued ha! Fwngz rag fwngz, guh youzhiz, seizcin youh daeuj lo!" Dingq gij sing go angqyangz doenghduz iq, yawj gwnzbiengz doenghgo doenghduz cungj ndiu lo, gou simhai dwk riu lo.

Dahsau seizcin doq buet daeuj doq ciengq go, momo gizneix, lumhlumh gizhaenx, di he cungj mbouj youqndwi. Faexiq ndaej dahsau seizcin lumhlex, maj engq vaiq lo; gova go'nywj ndaej dahsau seizcin lumjlex, bienq engq moqsak engq lengj lo. Gyoengq gova go'nywj cungj ngaek gyaueuj vad fwngz coh dahsau seizcin, docih seizcin.

O! Seizcin daeuj lo, doenghgo doenghduz cungj ndiu lo, bienz raeuz engq gyaundeidei lo.

(Vangz Sijveij)

Baez Daih'it Gag Cawx Byaek

第一次自己买菜

Ngoenzneix, daxboh cawj byaek seiz cij fatyienh mboujmiz hing, couh heuh gou bae diengzhaw cawx hing. Gou mbouj siengj bae, aenvih gou damjsiuj, mbouj gamj gag bae, daxboh lumj baenz rox gou damjsiuj, couh naeuz gou, gou cijndeidei bae lo.

Youq gwnz loh gou doq byaij doq naemj: Gou wnggai baenzlawz cawx hing ne? Cungj hing yienghlawz cij ndei ne? Yaepyet doq daengz diengzhaw. Diengzhaw caen nauhyied, gwnz daiz baij rim byaek; lij baij mak dem, gij mak gak cungj gak yiengh yawj hwnjdaeuj cungj gig moqsien; dan gai noh gai bya hix caenx rim vunz. Gou doq byaij doq yawj, yawjraen miz dan he gai hing, gou gvaqbae yawj le yawj, raen hing de mbouj ndei geijlai, youh laebdaeb byaij baenaj. Youh miz dan he gai hing, miz haujlai vunz cawx gij hing dan de, gou siengj gij hing haenx haengjdingh dwg hing ndei, ndigah gou caenx hauejbae. Gou raen daxbuz he dawz ngauq hing he hwnjdaeuj yawjyawj le, fatyienh ngauq hing haenx deng camx sieng, youh cuengq dauqbae. De youh dawz ngauq he hwnjdaeuj yawj, raen ngauq haenx yienghsiengq mbouj ndei, youh cuengq dauqbae. Doeklaeng



de genj aeu ngauq maj haemq soh youh haemq oem he. Gou hix hag gij yiengh daxbuz genj hing, genj le ngauq "bizboedboed" he. Boux gai hing caengh le naeuz: "Maenz haj ngaenz." Gou sawqmwh siengj hwnj haxbaenh daxbuz gangj gyaq, couh naeuz bouxgaihing: "Lauxbanj, cienh di ndaej lwi?" Lauxbanj ngauz gyaueuj naeuz: "Baengzyoux iq, neix gaenq gig cienh lo." Gou cijndeidei dawz song maenz ngaenz okdaeuj, lauxbanj bouj ngaenz hawj gou le, gou daiq "bizboedboed" baema ranz lo.

Doenggvaq baez daih'it cawx byaek, gou ndaej lienh damj swheij, bangcoh bohmeuh guh di saeh, gou fatyienh gou majhung lo. (Maj Daz)

Rumz Vaekvaeu

多变的风

Gij rumz ndwenngeih couh lumj faj naj lwgnyez, naeuz bienq couh bienq.

Mbwn'gvengq seiz, rumz mbouj lumj mwh seizdoeng baenz yak lo, dauq dwg gig unqswnh, huzsienh, ci hauej naj daeuj, couh lumj boux daxbuz naj riunyumnyum ndeu rub naj gou, beij gij rumz seizdoeng ci hauej naj seiz lumj mid camx haenx ndei baenz cien boix fanh boix.

Daengz ngoenz fwndoek, rumz youh bienq diuqbeiz hwnjdaeuj, bae hwnjdangz seiz, couhcinj gou gang liengj, de lij mbouj cuengq gvaq gou, ci dwk aenliengj gou doeng ngeng sae ngeng, hawj fwn rwed gou, haih gou daengz gyausiz le buh cungj mbaeq lo, aeu ceijgaen daeuj uet buh hawj buh hawj.

Ngoenz mbwnraemh, rumz youh mbouj lumj ngoenz mbwn'gvengq seiz baenz unqswnh lo, dauq dwg rongxhuhu, bae hagdangz seiz, gij fwngz gou deng nit dwk gyaengj bae, couh lumj seizdoeng boemz youq gwnz naehang, nit dwk saenzdedded, saenz dwk heuj cungj "doxhoenx". Hwnj dangz dijyuz seiz, rumznit daj hozbuh, genbuh con hauej ndang gou bae, fwngz cungj deng nit dwk mazmoed lo. Ae! Rumz ha, mwngz cuengq gvaq gou ba, gou fuk saw lo!

Rumz, couh dwg yienghneix vaekvaeu. Yaep he dwg laeq nyez diuzbeiz he, yaep he dwg daxbuz unqswnh he, yaep he dwg duz iugvaiq yakrwix he.....

(Mauz Cinhyeij)

